

٧٠٦٣٣

شجون على الخريطة  
عمر سامح هلال

شجون على الخريطة/ شعر

عمر سامح هلال

الطبعة الأولى، ٢٠٠٨



دار اكتب للنشر والتوزيع

القاهرة ، اش المعهد الديني ، المرج

هاتف : ٠٢٢٤٤٠٥٠٤٧

موبايل : ٠١٢٩٢٥١٥٩٢ - ١٨٢٣٦٣٠٣٥

E – mail : dar\_oktob@gawab.com

المدير العام:

يحيى هاشم

تصميم الغلاف:

حاتم عرفة

رقم الإيداع : ٢٠٠٧/١٣١٨٢

I.S.B.N: ٩٧٨-٩٧٧-٦٢٩٧-٢٥-٧

جميع الحقوق محفوظة ©

# **شجون على الخريطة**

**شعر**

**عمر سامح هلال**

**الطبعة الأولى**

**٢٠٠٨**



**دار الكتب للنشر والتوزيع**



## إهداء

إلى روح الشاعر الكبير  
أحمد عفيفي...

الذي استمعتُ إلى شعره مِنهُ-  
مرتين..

ثمّ رحّل...

و تركّني أقروءه بنفسي

لأتعلم منه عِبْرَةَ الشعراء  
و الحياة..

و عِبْرَةَ الشعراء و الموت...

و عِبْرَةَ الشعراء و الزّمن

عمر

فبراير ٢٠٠٧



## مقدمة

معرفتي بالشاعر "عمر سامح هلال"  
ترجع إلى عام ١٩٩٩، في هذا العام  
كان ميلاد جماعة الشعر بنادي الصيد  
المصري التي يُشرفني إشرافي عليها منذ  
هذا التاريخ.

في أول لقاء للجماعة في فبراير من  
نفس العام، قرأ علينا عمر إحدى  
قصائده، كان وقتها في المرحلة الثانوية و  
على ما أذكر في السنة الأولى منها، وكان  
حاضراً لهذا اللقاء شاعر فصحي كبير له  
وضعه و مكانته في الساحة الأدبية  
و أعتز به كثيراً، انتقد هذا الشاعر  
عمر، فدافعت أنا عنه لأنني لمحت

فيه بذرة لشاعر جميل، تأثر عمر بالنقد،  
واختفى، حاولت الوصول إليه، لم أوفق.

مضت السنون، انتقل عمر إلى المرحلة  
الجامعية، ازداد نشاط جماعة الشعر. كثر  
عدد ضيوفها وعدد حاضري اللقاء  
الشهري لها، تسلل عمر حاضراً أحد  
اللقاءات كمستمع، لمخنة وعرفته في التو،  
توجهت إليه طالباً المشاركة، عاد لأجده  
شاعراً متمكناً من أدواته و موضوعاته،  
البعض يحطّمهم النقد، و لكن معدن  
عمر جعل النقد حافزاً له على  
التحدّي و الإبداع. أصدر ديوانه الأول  
"تقاسيم"، احتفينا بالديوان وبالشاعر في  
أحد لقاءات جماعة الشعر.

كثر إنتاج عمر، رأى أن يطرح  
ديوانه الثاني، جاءني طالباً أن أكتب المقدمة



له، أسعدني طلبه، فهو يمثل لي تقديرًا أعتز  
به و يزداد اعتزازي به كأحد زهور  
جماعة الشعر. فهذا هو الديوان الثاني  
لشاعر شاب عمره أربعة و عشرون  
عاماً، جاء بتجربة غنيّة تؤكد أن  
شباب مصر هم الأمل، و أن شموعه  
المضيئة ستظل إلى الأبد طالما تواجد بها  
مثل هذا الشاب الجاد، الملتزم، المبدع  
الخالق. نعود إلى الديوان لنكتشف أننا أمام  
شاعر مختلف. له مواضيعه ورؤيته الخاصة  
المميزة، يتضح ذلك من الصفحة الأولى  
للديوان و أعني به إهداءه ديوانه لشاعر  
العامية الراحل، الأستاذ الكبير - كما  
وصفه - أحمد عفيفي. إنها لمسة وفاء و في  
نفس الوقت رسالة واضحة بأن على  
الجيل الجديد الذي يمثل شاعرنا ألا  
يرفض الماضي و رموزه، بل يتعلم منهم  
ويقتدي بهم. لا توجد أية صلة بين

شاعرنا والشاعر المرحوم بإذن الله أحمد  
عفيفي غير صلة الاستماع و الاستمتاع، إلا  
أنه رأى أنه الأحق بالإهداء. و لكم أسعدني  
إهداؤه فقد كان أحمد عفيفي صديقاً  
عزيراً ليس لي وحدي و لكن لكل من  
يعشق الشعر في مصر ، خاصة العامي منه.

يبدأ شاعرنا ديوانه بقصيدة "تعارف"  
يقدّم فيها نفسه لنرى: صناعته، سكوته،  
صحبه، رحلته، فرحته، مرساه، في أبيات  
قليلة موجزة شاملة. تتوالى القصائد المعبرة  
عن جيله في كل أحواله: في قلقه، بحسه  
عن مرآة لأحاسيسه، خوفه من الغد  
وحيرته. ثم ينعطف شاعرنا بعد ذلك إلى  
الحب. الحب في الأعم مرتبط بالشباب، فهو  
شغلهم الشاغل، لكنه عند شاعرنا هو أحد  
اهتماماته أفرد له في ديوانه سبع قصائد، نقرأ  
فيها مفردات و كلمات جديدة بعد أن  
استهلك الشعراء كلام الحب. و تأتي

القصيدة الثامنة عن الحب العذري، المستمر،  
المتجدد: حب الأم في قصيدته "في عيد  
الأم"، وكما في لغة المسرح والأداء عندما  
يتصاعد الصوت متتالياً "كروشيندو" بأن  
الحب الأعلى و الأسمى و الأشف: حب الله  
و الإذعان له.

من أول القصيدة الخامسة عشر و حتى  
نهاية الديوان نعيش مع الشاعر رحلة  
بديعةً يسطرُ فيها معاناته و مواقفه عن الفن  
والشعر. يكتب شاعرنا بحرقَة المنقهر  
والتأسى على حالهما كصورة لحال  
المجتمع. و هذا يوضّح اهتمام الشاعر  
الأساسي و هو "مصر" الحاضرة دائماً في  
وجدان شاعرنا.

أتركك أيها القارئ العزيز بين يدي هذا  
الديوان وأنا واثق أنك ستستمتع كما  
استمتعت أنا بكل جميل جاء فيه.

**محمد أمين محرم**



## تعارُف

ولو تسأل عن الصنعة  
أنا عشق البديع كاري

ولو تسأل عن السكّنى  
أنا المعنى الجميل داري

ولو تسأل عن الصُّحبة  
صُحابي هُمّا أفكاري

ولو تسأل عن الرحلة  
فمن جهلي- لأسراري

ولو تسأل عن الفرحة  
فإحساسك بأشعاري

ولو تسأل عن الوحدة  
سُكوت لحنِي و أوتاري

ولو تسأل عن المرسَى  
ماهوش باين من الصاري

.....

.....

تصقح شعري لو عاوز  
هتعرف كل أخباري

## أنا قلقان

(١)

أنا قلقان..  
ولسنة بليف حتى الآن  
على مراية لأحاسيسي  
على مسرح لكواليسي  
على السبغة..  
على العنوان

(٢)

أنا قلقان..  
ولسنة بحس حتى الآن  
بخوف من بكرة و الآتي  
وهل هيكون لنا مواتي  
ونزرع م الأمل  
فدآن؟

(٣)

أنا قلقان..  
ولسّة بُصّ حتى الآن  
على الدُّنيا بخوف ساذج  
بعين بتشكّ وتمازج  
مابين الحق  
والُبْهتان

(٤)

أنا قلقان..  
ولسّة بَجِنّ حتى الآن  
وافكّر ف اللي حبيّتها  
و أقول يا قلبي: كون  
بيتها  
ولو بيّنا  
بحور أشجان

(٥)

أنا قلقان..  
ولسّة بَرْد حتى الآن  
على اللهفة و أقول:



حاضر  
ولو كان الفراق  
حاضر  
وهز النفس  
و الوجدان

(٦)

أنا قلقان..  
ولسّة بَمِدّ حتى الآن  
في بحر الأسئلة شراعى  
في موج صاخب لا  
بيراعى...  
ولا بيّمد  
كفّ حنان

(٧)

أنا قلقان..  
ولسّة مُصّر حتى الآن  
على إن الكلام واجب  
ولو حتّى ما كان عاجب  
وشفّنّا من العذاب  
ألوان

\*\*\*\*\*

أنا قلقان...  
و أتمنى نقوللى الآن  
إذا كان المُراد حاصل  
إذا كان الكلام واصل  
وليك الشكر  
والعرفان

## حالة شجن

الشَّهْرَ زِي الشَّهْرَ  
رغم امتداد الدَّهْرِ

نفس الضياع والخوف  
نفس السُّكَّات والقهر

شُفَّت الحياة و لقيت  
الوشَّ زِي الضَّهْرِ

ونصَّيبي مهما هعيش:  
طاولة، ورمية زَهْر

أبكي في سِرِّي عَلَيْهِ  
واضحك معاه في الجَهْرِ

وَأَسْأَلُ..وَحِيرَتِي تَسِيلُ  
جُؤْهُ الْجَوَانِحِ- نَهْرُ:

غَالِيَةُ الْعَرُوسَةِ صَحِيحٌ؟  
وَلَا اللَّيِّ غَالِي الْمَهْرُ؟

## عن الخُب

الخُب يطفئ النار  
ويزهزه النّوَّار  
ويخلّي قلب الليل  
يضئوي ويبقى نهار  
ويقصّر المسافات  
ويقرب المشوار  
ووانس الساهرين  
ويجالس السُّمار  
ويحرك الخامدين  
ويحمّس الأحرار  
ويحرّر الأرواح  
ويبصّر الأفكار  
ويخفف الأحزان  
ويطمّن المحتار  
ويغذي كل كلام

وَنَحَلِّي أَيِّ حِوَارٍ  
وَإِنْ صَادَفُهُ مَرَّةً جِدَارٌ  
هَيْهَذَا أَلْفَ جِدَارٍ  
حَتَّى الَّتِي دَارُهُ بَعِيدٌ  
هَيَكُونُ لَهُ مَأْوَى وَ دَارٌ  
طَاقَةُ أَمَلٍ وَ إِيْمَانٍ  
دَفْعَةُ خُطَى وَ إِيْصْرَارٍ  
وَفَا أَعْظَمَ الرِّسَالَاتِ  
كَانَ هُوَ أَرْقَى شِعَارٍ  
بِوُجُودِهِ بَيْنَ النَّاسِ  
وَصَّى النَّبِيُّ الْمُخْتَارُ:  
قَالَ " كُونُوا كَالْبُنْيَانِ  
جَبُّوا الْقَرِيبَ وَالْجَارَ "

---

أَنَا قَلْبِي طَيْرٌ ، وَ سَمَاهُ  
فِي الْخُبِّ بِاسْتِمْرَارٍ  
هُوَ الطَّرِيقُ لِلْبُوحِ  
فِي عَالَمِ الْأَسْرَارِ  
وَلِرُؤْيَا الْأَشْيَاءِ  
الَّتِي حَاجِبَهَا سِتَارُ

## الشَّعْرة

ليه يا حبيبتي  
عَ البُعد ناوية؟  
لا أنا غاوي فُرقة  
ولا إنتي غاوية  
و كمان حياتي  
بعديكي خاوية  
قالت: كفاية  
دي الغيرة كاوية!  
ضَمَّتْهَا لِيَا  
قُلْتُ بعينَيَّا:  
شايفة القضية  
من أنهى زاوية؟  
دي الغيرة ميزة  
جُوءَ الغريزة  
مُرَّة وَلَذِيذَة

جراحة ومداوية

مهما اتبنا  
ولا اتشاجنا  
خلي ما بيننا  
شعرة معاوية



## منك أنا

طاقة أمل  
في بحر من غربة  
وليل من شجن وآلام  
تسلم لقلبي شريكة الحب و الأحلام  
تسلم عيونها الطيبة الصافية  
تسلم لي روحها المخلصة الدافية  
تسلم لي دائماً و أبقي ليها  
و أسعدها مدى الأيام

كنّا سوا  
والحب كان جنة  
بتكسي دربها الأفراح  
وسماها قرب و نشوة بتنعش الأرواح  
إيه اللي ممكن أبتغيه تاني؟  
إيه اللي ممكن يحييي وجداني؟

إيه اللي يخلق في الثواني  
لخطوتنا المحبّة براح؟

فات الزمّن  
بس اللقا و أحلامه  
عُمره في الحقيقة ما فات  
هوّ اللي بيخلّيني أصحّي  
في السعادة وأبات  
مين يرعى شوقنا وحبنا غيرنا  
ولمين سواه هتكون خطى سيرنا  
وبايه هيوصل للأعالي  
و أبعد م السبع سماوات؟

منك أنا  
وانتي حبيبتي بتسري  
في خبايا الروح  
وف روعة الأحاسيس  
وأسرار السكوت والبوح  
وحّد مصيرنا البعد ولا فرق  
خلانا نحياي العمر نتشوّق  
لأوان رجوع الشمس تانى  
وطيرنا اللي اغترّب- للدوح

## البيانو

بسمتك...ضحكة عيونك  
أد إليه للقلب كانوا  
الليلة دى سرحت فيهم  
فجأة سابوا الغيب..وبانوا  
قلبي رفرف..ساب ضلوعي  
شفتك إنتي..في مكانه  
شفتك إنتي..يا حبيبتي  
يا هدى عمري و ميزانه  
شفتك إنتي وقلت يمكن  
القلوب لازم يعانوا..  
لجل ما تقرب ما بينهم  
قسوة البعد و نيرانه

بس برضه قلت جاي  
كل فرح وله أوانه  
دا الحبيب هو السعادة  
وكل شيء بيهون عشانه  
ليه يا عم نكشت جرحي؟  
كان لزومه إيه البيانو؟!

## مفیش بشر زیک

حبیبتی مفیش بشر زیک  
بقولها بصدق وأمانة  
بَدیع الصنْع خِلاکي  
بدون ما تحسني، فَنانة  
بترسم بِسْمِکَ لوحة  
بتنطق حکمة و رزانة  
ساعات وساعات بتتשאقي  
کطفلة لاهية نشوانة  
وصوتک زى مزیکاً  
شهيئة، ساحرة، رثانة  
عيونک قصّة شعبية  
بحال الدنيا مليانة  
سعادة قلب و مراره  
وحفظ لعهد و خيانة  
أكون إنسان: شرف ليّه  
ما دُمتي إنتى إنسانة!

## قاصد أمان الفجر

قاصد أمان الفجر وحنان الصبيّة  
رَبِّي اللّٰهُ خَلَقَ الصَّبْرَ..  
أُذِرْنِي بِاللّٰهِ يَهْ  
أِهْ يَا وَجْدَ الْمِغْتَرِبِ فِي الشَّجَوْنَ  
أِهْ يَا مَجْدَ اللّٰهِ عَشِيقَ فِي سَكُونِ  
أِهْ عَلَيْكَ يَا لِّلّٰهِ بُعْدُكَ قُرْبُ  
أِهْ عَلَيْنَا وَاحِنَا لَا تَتَيْنِ غُرْبُ  
أَنَا عَذْرُكَ..  
لَأَنَّ الْبُعْدَ مَشَى ذَنْبُكَ  
وَلَكِنْ بَرَضُهُ كَانَ أَمَلِي  
أَعِيشْ جَنْبُكَ  
وَأَبْدُرْ شَوْقَ قَوَافِيهِ عَلَى سَمْعِكَ  
وَيَفْزَعُ كُلُّ مَا فِيهِ  
إِذَا دَمَعِكَ..  
يَزُلُّ سُلْسَالُ  
عِشَانِ خَائِفِهِ مِنَ الْآتِي

وأنا ذاتي..  
مَدَى واسع أَبْحَرُ فيه و أنزلك  
وأغزلك..  
من اللؤلؤ و م المرجان  
وشاح يحميكي من شر البشر  
و الجان  
ويفصل بين جلال طهرك  
وبين الحقد والبُهتان

و أتمادى فى أحلامي  
وأوهامي  
و أشوفها راقصة فُذَامى  
وانقى منها أطرفها  
وأظرفها  
واقكر إمتى هخطفها  
على ضَهر الخُصان لابیض  
وینجوز!  
و لا یبوز...  
غراب النّحس فى وشوشنا  
و لا تحوشنا  
رياح الخوف عن الغایة  
و ف النّشوة ومیدانها

تكون دائماً  
لنا الراية  
ويبقى الفرح ترنيمه  
وتقسيمه  
وشمسايه  
وضيلايه  
ويبقى الحب ما بيننا  
نشوقه و هو ساكننا  
وأجمل كلمة قلناها..  
يكون هو  
وأعلى نجمة طلناها..  
يكون هو  
وهو برضه سير ثباتنا  
في المحنه  
لأن إحنا..  
ضروري نكمل الرحلة  
سواء مرة..  
سواء تحلى  
نهدي الجرح ونعدي  
لنهار بكره  
ولو كان الحنين مكره..  
نقول له اصبر



دا في صبرك يزيد الأجر  
ونقدرع الفراق والخوف  
ولعبر فوق لهيب الهجر  
وتفضل غنوة العاشق:  
أنا قاصد... أمان الفجر

## إنّتي والقصيدة

و موج الحياة لو طوّاكي وسيبتي  
إيديّا، وخذّتي السعادة و غيبتي  
وجودك ف أغلى مكان جُوءة روعي  
عشان حاجة واحدة: لأنك حبيبتي

لأنك قدرتي تثيري انبهاري  
و أنا الدّهشة هيّ سبيل اختياري  
و من غير تحدّي كتابتي ما تسوي  
و من غير شرارة .. مابتقيدش ناري

لأنك عجيبة و مش تقليديّة  
جمالك دا كان للمشاعر هديّة  
وصحّي القوافي و عطر سُلّافي  
وخلّي بحور البدع سَرمديّة

ومهما أشوف من مفاتن جيدة  
مكائك في قمة بعيدة و فرجة  
عشان إنتي أول حبيبة ف حياتي  
ومفيش ف الحياة...زى أول قصيدة!

## فى عيد الأم

مهما يقول المُنْغِي و يشعر الشاعر  
عن مَعْنَى فَضْلِ الأم...مُشْ وافى  
إيه فى أصالة حبِّها الدائم  
إيه فى غلاوة قُرْبِها الدافى  
فين ألقى ملجأ من أسَى الدنيا  
وارمى حمولي من على كتافى  
أبكي، وأرجع طفل ولا أخجل  
والقى ف حنانها بلسمي الشافى  
يمنعني همّي النوم بعيد عنها  
و ثواني أبقي ف حُضْنِها غافى  
وأصحى على بسمة أمل منها  
ناسي جراح الحزن، متعافى  
يسعدنى إيه غير إني أرضيها؟  
دا كل أملى، و أسمى أهدافى  
و الله لسر قدّمَلك عُمرى  
هشعر - يا أمي - بآئه مش كافي

## أرزاق

أرزاق يا دنيا و تقسيمات رباني  
كندوز لناس، و لناس ريش أو ضاني  
عثمانلى يوم، وف يوم أسد بريطاني  
للغير في يوم، و ف يوم لذى أوطاني  
في الغيب في يوم، وف يوم ما بين أحضاني  
حسرة في يوم، وف يوم هنا سلطانى

أنا قلت يوم لما الأمل أغراني  
والسعي طال بي و الانتظار أضناني  
"إشمعنى أنا دائماً ورا بحصاني؟"  
فسمعت صوت بيقول: "إذا ترعاني  
بالطاعة ليّه والرّضا بقضاني  
هتعيش سعيد.. و كمان تنول غفراني

## رب واحد

حُطَّ الهموم عَ الجبل  
تَلَقَى الجبل يندك  
عُزَّ الحَجَر بالأسى  
تَلَقَى الحَجَر ينشك  
حاول تحل العُقْد  
تَصْعَب، ولا تَنفَك  
جَرَّب حلول البشر  
تَلَاقِيهَا عَكَ ف عَكَ  
يعنى الحياة و القَدَر  
طَبَّقْ عَلَيْكَ الْفَكَ؟  
طب إيه وسيلة الهرب  
من أسْر خَانَةِ اليك  
هل فى اليقين و الأمل  
ولا الجموح والشك؟  
فكّر... ومهمَن حصل  
فيه رب واحد لك

## بين الجبار و ربه

حياتنا قطر ومعدّي  
يهلّ ف لحظة ثم يفوت  
وعمره ف يوم ما هيهدي  
ولو بالسحر والكهنوت  
وجايب خلق و موذي  
وسالك رحلته بجبروت  
و كام من وغد متحدي  
وشاهر للحياة نبوت  
يصيح: في الدنيا مين قدي  
دا ملو الأرض عندي يا قوت  
بصغر للبشر خدي  
عشان من غيري ما لهم قوت  
تردّ القدرة: يا مادي  
وجودك في الحياة ممقوت  
غضبت عليك، وده ردّي:

تعيش في لعنتي وتموت  
عجيب أمرك.. تقف ضدى  
دا أنا العالم.. أنا الملكوت  
أنا إلهك أيا عبدي  
وأمرى ف كل شىء موقوت  
تموت من شوكة فى وردي  
وتحيا.. لو فى بطن الحوت



## نسمة أمل

و مهما ظروفا تنهَّب..  
و مهما الوضع يتزقَّت..  
أهى دايرة وف الآخر..  
بتتشقلب إذا لفَّت  
دي دنيا وطبعها ملعب  
ما تبقى دنيا لو كَفَّت!  
و كام من طفلة مسكينة  
عياتها كلها اتصَفَّت  
وضاع منها الأمل كله  
و دمعته لا جَفَّت  
يفوت الوقت يلقاها  
عروسة للهنا اتزقَّت  
و كام من شخص كان نكرة  
تلاقى الدنيا له اصطَقَّت  
و كام من ملك متعظم

كَلَابِ السَّكَّةِ فِيهِ انْشَقَّتِ  
وَكَا مِمَّنْ أُمَّةٌ مَقْهُورَةٌ  
أَنْتِ بِالْمَعْجِزَةِ وَوَقَّتِ  
يَا عَالِمَ بُكْرَةٍ إِيَّاهُ يَحْصِلُ  
بِاسْرِعٍ مَا أَنْتَ تَتَلَقَّتِ

## وجهات نظر

(١)

أعمى أنا...و يا ريتني ما فتئت  
فاشل أنا..لكن فى خيبتى نجحت  
معروف أنا..دائماً ورأ و لثحت  
عائش أنا...وأول ما مت ارتحت

(٢)

أعمى أنا..لو كنت من غير وغي  
فاشل أنا..لو كنت أبطل سعي  
معروف أنا: برّة قطيع الرّاعي  
عائش أنا..ولا عمري هصبح نعي

## شمعة واحدة

بنقول فى إيه ونعيد؟  
وطريقنا لسنة بعيد  
فجر الوصول مجهول  
طول ما الكفاح أناشيد  
أن الأوان يا رفـاق  
يبقى المصير فى الإيد  
نقرا التاريخ و نزيح  
عن عقلنا الجلاميد  
نعرف حقيقة الناس  
لو سادة ولا عبيد  
ومكاننا فين؟ و الدين  
بيقـل ولا يزيد؟  
دين السكـات و الخوف  
و الجـهل، بالتأكيد  
بس الحياة: منابات

و لَکَلِّ شَیْءٍ مَّوَاعِیدَ  
وَاللَّیْلِ - وَلَوْ جَبَّارَ -  
حَالِکَ، وَبَرْدُهُ شَدِیدَ  
لَسَّۀَ الدَّفَا وَالنُّورَ...  
فِی شَمْعَةٍ وَاحِدَةٍ تَقِیدَ

## قوله الكلام دا

قولو الكلام دا يا ناس للي مالوش ماضي  
من قبل هذا الزمان والحق سيف ماضي  
وأنا رَغم مُر العذاب ع الدَّرب ده ماضي  
حالف بيذا الكلام وإذا اقْتَضَيْتْ..ماضي!

قولو الكلام دا يا ناس للي مالوش حاضِر  
من قبل هذا الزمان والظلم كان حاضِر  
وأنا رَغم مُر العذاب مش راح أقول حاضِر  
مهما وعَظَنِي الخسيس ونَصَحَنِي أو حاضِر

## كِبَايَة شَاي

و بعد السّغّي طول اليوم..  
ورا اللّقمة وورا الهدمة  
ورا فُرصة..  
ورا خدمة  
ورا قرش لعيال بالكوم  
وبعد كلام كثير جدًا  
و بعد مخاض عسير جدًا  
قعد يشرب شوية شاي  
و في سمعه العشا بتدّن  
وتفل الشاي في دورائه  
سكوته..  
ثم فورائه  
ورجوعه من طريق ماهو جاي.  
وبعد شوية كبسه النوم  
غطس في الصمت بعد الغوم  
هيمد كالطوبى في مكانه  
يا شَبْهُهُ بَيْفَل فَنجانه  
وجهله الأزلّى ليه  
وإزاي

## حوار عن الفن

(١)

بيقوللي الشعر  
ما عاد له سيعر  
ف زمن الروبوت والذرة  
وبين الفن  
دا أرّ و زنّ  
ما ينفع غير ف بلاد برّة  
وبين الناس  
اللي بتنداس  
في اليوم الواحد ميت مرّة  
ملهاش إحساس  
ببديع وجناس  
وإنشالله يكون شعرك دُرّة  
كله ف دُنياه  
عايش بَلواه



و حياته المشحونة المرّة  
اللي بيحتاط  
قبل ما يتشاط  
أو ييجى الموت على حين غرّة  
من غير مايخوش  
ملاليم وقروش  
لمراته و يمكن للضرّة  
ويقولك سيب  
الشّعروثوب  
دا الشعر من الفثن الكبرى!  
ويقولك مين  
يسمع مجانين  
ملاحيس مهاويس زى الشعرا  
بقى دى أشكال  
تسمع موأل  
أو شعر و لو كت مضطرة؟  
فالأريح ليك  
والأراف بيك  
تجمع أشعارك دي ف صرة  
وف أقرب بير  
إرميها و طير  
ومشاعرك سيبها تعيش حرة

(٢)

أنا قلت إزاي  
تكسر لي النأي  
و كان غُنْاي للخير طعنة  
دا الفن طريق  
و بريق لغريق  
و رسالة و إطلالة و معنى  
و الفن دا سيف  
بيشق الزيف  
و يخلى العالم تسمّعنا  
و بدال الهَم  
ما يملا الدَم  
و يُسكن روحنا ويوجّعنا...  
مائخلى البُوح  
بهموم الروح  
منبعنا ومصدر إبداعنا  
أصل الإنسان  
- مَهْمَن يتهان -  
عَنْ صِدْقِهِ لَا يُمكنِ يَسْتَغْنَى  
وعن الإحساس  
بهموم النَّاسِ،

مانقولش: بایه ده ینفعنا؟  
ماهو لولا الود  
ما كان اتمد  
ولو خیط واحد یجمعا  
ولا كان الكون  
اصبح مسكون  
ولا ساع التانیین ولا ساعنا  
یجازیه الجهل:  
یصعب سهل  
یخلى اللى بیفهم: لعنة  
بیطقی شمس  
ویهد نفوس  
وئیلوي من العجز دراعنا  
إحمینا یا رب،  
ف یومنا الصعب  
وطهر روحنا، ورجعنا

## الموت فى المتاهة

قَيَمْنَا الْعَالِيَةَ فَيْنَهَا؟  
وَمِنْ لِبَعِيد نَفَاها  
وَمِنْ بَعْد الْكِرَامَةِ  
جَرَجَرها مِنْ قَفَاها  
شَمَّتْ فِيها الْأَعَادِي  
وَوَصَمَهَا بِالتَّفَاهَةِ  
قَلْنَا: الْأَخْلَاقُ يَا عَالَمَ  
قَلْتُوا الْأَخْلَاقَ.. يَلَاها!  
لَمَّا الْأَجْيَالُ دَى بَاطِلَتْ  
وَفَسَادُ الذُّوقِ مَلَاها  
وَبَقِيَ التَّفَكِيرُ.. جِنَايَةِ!  
وَبَقِيَ الْإِسْفَافُ وَجَاهَةِ!  
وَالْجَهْلُ زَادَ وَغَطَّى  
وَعَلَى الْعُلَمَاءِ تَبَاهَى  
لَوْ مَوْتَ الْحَسَنِ طَوَّلَ

و الفجر لا تنامى  
بعد أما نعش فى توهه  
هنموت جوه المتاهة

## مواطن صريح

هتسألني: حَيًّا؟  
هقولك: بَعِيث  
هتسال: يتترزق؟  
هقولك: مَفِيث  
"قرايبك، حبايبك"  
هقولك: مَالِيش  
"ولغوة لسانك؟"  
- صادرها الشاويش  
"وَحَظ العوالم؟"  
- حِلِف مايجينيش  
"وايه يا ابني جابرَك"  
ماتفقدش صبرَك؟"  
هقولك: عيالي  
وقررش الحشيش

## الغُرْبَة

يا للي إنتَ ماسك في خيط.... الغُرْبَة مَذاهلك  
يا للي إنتَ جاري لسراب.. شَدَّك و زهز هلك  
يا للي إنتَ راحل و سايب... للضنى أهلك  
فَكُرْت قَبْلَة في مين دا اللي بيندهلك  
بَصِيت على الدرب حَبَّه و قِسْتَه على مهلك؟  
إوعاك تظن إن صعبك راح يكون سهلك  
غلطان و غافل يا صاحبي، و غلطتك: جَهلك  
إن النصيب راح يصيب، و الدنيا شايهلك  
و إن النعيم في الإيمان، و إن اليقين مسلك  
و إن الرضا كم أراح، و الهَم.. كم أهلك

## خُسَارَتِكَ يَا جَدَع

الأبلاطين لدَع...  
خُسَارَتِكَ يَا جَدَع!  
حاولت تفيد بلادك  
بكدِّك واجتهادك  
بريت من قوت ولادك  
وسويت البدع  
خسارتك يا جدع  
زرعت ف أرض بايرة  
بقيت لافف في دايرة  
وبعض الناس مسائرة  
وأغلبها انخدع  
خسارتك يا جدع

يا واد بطل لجاجة!  
وسيني للخواجة  
أقوله كل حاجة  
بوشوشة الودع!



## ثروات بلادنا

ثروات بلادنا الفريدة مَلَقَحَة بالكوم  
بتعاني زحف الزبالة وكتمة البدروم  
تتمنى مرّة تكون شحنة بصل أو توم  
واحنا بنسمع ونسكت. لا بُزَعْل ولا لوم  
أو تَلْقَى واحد يقول: دا احنا ولاد اليوم  
وكان دا مش تاريخنا اللي انفرد به القوم  
وكان جُوه العُروق مش دَم...ميكريكروم

## لو ضميرك صدّي

لو ضميرك صدّي..  
بيعه!

ودور بسرّ الحزن  
ذيعه

ووطّي لشيطانك  
وطيعه

وسيله اولادك  
يضيعوا

و نقي من صاحبك  
و ضيعه

وَنَقِّي مِنْ قَتَاكَ  
خَلِيعَهُ

و دوس ما إِنَّا  
مَسْطِيعُهُ

بِسْ حُدْ بِأَلْكَ، هَتَخَسَر  
حَضِنْنَا الدَافِي  
و رِبِيعُهُ

وَتَبْقَى وَحْدَكَ  
يَوْمَ حَسَابِكَ  
و اللى وَحْدَهُ  
مِين شَفِيعَهُ؟؟

## كلام.. ف ساعة صفًا

لا هيا سياسة... ولا فلسفة  
ولا هُوا اعتباط عَ البُسط  
أو سفه  
دا خاطر وَصَلِي  
ف لحظة تُجَلِي  
وواصل إليكم في ساعة صفًا  
فلو تسمَحولي  
هقول وانصتولي  
و صلّوا معايَا على المُصطفى:  
أنا معاكو إن الحياة مؤرقة  
كثيية، وقاسية، ومش مُنصِفة  
ولو تَنعِتوها بأسوأ صِفة  
لا تَلقُو ملامَة ولا بَسْئَة  
ولكن في رأيي... وبالمعرفة  
إذا ما الحَصيف من ملامه اكْتَفَى

وشاف الحياة من عيون الوفا  
لناس فيه ما بينو وما بينهم دقا  
وروحه وروحهم سوا مرفقة  
هيلقى المزار فى القرار اختفى  
وعذر التشاؤم خالص وانتفى  
وقلبه رضي عن حياته وعفا  
وشاف منها واجهة.. يدال القفا!

## أسوأ إثنيين

عقلين وأعقلهم غبي	وصوتين وأجملهم فحيح
بيقولوا للرحمة: اهرّبي	ويقولوا للفجر استبيح
والعدل عنهم اجنّبي	والحق ما بينهم دّبيح
لو كنت جاهل مارّبي	مُضطرّ أقولك بالصريح:
واحد بيغلط ف النبي	وواحد بيغلط في المسيح

## سفيرة الفن الهادف

يا أصولي يا رجعي يا مُتخلف  
يا بليد الفكر، يا دَسَّاس  
ياللي إنتَ بجهلك متكئف  
ودماغك قافلته بترباس  
وف كَهْفك يَخْلُق أوهامك  
وتعيشها، وتطعن ف الناس  
ماخلاص انتَهت العبودية  
ولا عاد فيه جارية، ونَحَّاس  
وبقينا ف زمن الحرية  
خَلَّيْكَ إنتَ الإفلاس!  
إزاي تتطاول على قنّي  
وتقول دا إباحي و هلاس  
إيش وَصَّل عقلك للسينما  
متشجج على أي أساس؟  
علشان الجنس ف أفلامي  
وحكاية الوثر الحساس؟  
ما نفوق بَقى وتعيش الواقع

و تشوف الدنيا يا محتاس  
الدنيا بقت بولة كبيرة  
مليانة فراولة وأناس!  
والينت بقت روثة وموضة  
وأبوها بيصرف بحماس  
ولا همّة تصاحب ميت واحد  
ولا فارقة معاه يحصل ماس  
أنا شايفة دا شيء طيب جدًا  
" لنواكب مجرى الأحداث!"  
يعني أنا لو طيّبت على غفلة  
ولقيت أمّورتى بتتباس  
لا هور ولا هزل، دا أنا هفرح!  
وأعزمهم لاتنين على كاس  
و دى آخر حاجة هاقولها لك  
والإمضاء، يا عزيزي،

.....



## الشاعر و القرعجية

عاملين لنا هوساً  
وفالقين لنا دماغنا  
تطويل عشان حضرة  
سيدنا و أنبغنا!  
وإله مَفِيش أبدع  
وإله مَفِيش أغنى  
من كنز إبداعه  
لا ف شعر  
لا ف مَغنى!

.....

وأما سمعنا له  
مُثنا! ثَمَر مَغنا!  
وكان أبياته  
إقلام على صداغنا  
من كثر ما هو سيئ

قَرَّبَ يَجِيبُ دَاغِنَا

.....

خَلَّص. وَ كَامَ وَاحِد  
مِنْ عُصْبَتِهِ قَامَلَهُ  
وَالْكُلَّ بِنِيسِيءَ لَهُ  
مَعَ إِنَّهُ بِيَجَامَلَهُ  
اللي يقول: فَلَئِنَّ!  
واللي يقول: قِيمَةُ!  
أفكار مَفِيشَ مِنْهَا  
جَبَّارَةٌ وَ مُهِمَّةُ  
واللي يقول: شَفُوتُو  
فِي مَهَارَّتِهِ بِالذَّمَّةِ؟  
لَمَّا الْعَبِيطُ صَدَّقَ  
وَاتْلُبِيسَ الْعِمَّةُ!  
كَانَ نَفْسِي أَقُولُهُ اصْحَى  
وَافْهَمْنِي يَا سَيِّدَ  
اللي إِنَّتَ بِنَقُولُهُ  
دَا لَا شِعْرَ، وَلَا جَيِّدَ  
بَسَ الْأَدَبَ حَاشَنِي  
خَلَانِي مَتَقَيِّدَ!

## شجون على الخريطة

بزقة بسيطة..  
تدور الخريطة!  
وأطلع ف لحظة الجبال الرهيبه  
وأعبر ف لحظة البحار الغويطة  
وتبقى البلاد  
و الشعوب  
و المشاهد  
مجرد أسامي وألوان عبيطة!  
ولكن مُضَلَع محندق يخايل  
وجنبه مثلث كأجدع زمايل  
وفي وسطه فاصل معرّج ومايل  
بيجبرني أشوف الأمور مش بسيطة!  
و الأقيني قايل:  
مفيش فايده فيكى و فينا  
يا مَصر  
ما بينا الهموم والشجون

والفتايل  
وأوجاع اليمّة  
مفّيش ليها حَصْر  
وأوقات تزيد الهموم  
ع اللي شايل  
فيوصيم بلاده بذنوب أى عصر  
ولكن فى لحظة سيرتها ما تيجى  
تسوّي الهوايل!  
وتعمل عمايل!  
تخلّي الحرارة تعود للمحبّة  
وطعم المرارة من الحلق  
زاييل  
تطريّ العداوة  
وصخر القساوة  
لحدّ أما يبقى على الخدّ  
ساييل  
تخلّي المشاعر تطوف  
ع الليالي  
وتبيعت لكل الخلايق  
رساييل  
إذا كُنّا حتّى هنو هب حياتنا  
ماتكفّيش يا بلدى  
نرُدّ الجمائل

## يكون المجد بالإنسان

يكون المجد بالإنسان  
و لو متهان  
و لو عايش بلا عنوان  
و لو أعمى وعنده عيون  
و لو أخرس و عنده لسان  
لأن الحق مش عايز صخب  
عالي  
ولا الفكرة لها منعة و تمن  
غالي  
ولا عُمر الخطر نصَّبُه القَدَر  
سجَّان

يا عطر الثورة  
يا مداعب أنوف الناس  
بتوصل لينا وإن عدّوا لينا  
الأنفاس  
يا بذر الصَّحو  
يا حايش ثَمَر في الجوف

بكاره الأرض مستنئيه ضربه

فاس

وبعديها الشجر يطلع

وبعديها الندى يلمع

على زهر التحدي وزهر

العزة والإحساس

دي دوره والتاريخ شاهد

طالما الشعب بيجاهد

ولو بالكلمة أو دقة على

الأذهان

فأيوم المعجزات آتي

ولو كان العباب عاتي

شراعك يا وطن عالي وعظيم

الشان

شراعك يا وطن راية

كرامتك يا وطن غاية

بتهديها الشعوب روحها في

كل مكان

و يبقى المجد للإنسان

و يبقى المجد للإنسان

## تَقُولُ بِلَدِي

تَقُولُ: بِلَدِي  
أَقُولُكَ.. عِشْقُ رَبَّانِي  
وَأَعْظَمُ مَعْنَى رَبَّانِي  
وَلَقَمَةٌ وَاحِدَةٌ مَقْسُومَةٌ  
مَا بَيْنَ مُسْلِمٍ وَنَصْرَانِي  
وَصَوْتُ نَادَى مِنَ الْمَاضِي  
فِي عِزِّ الْعَتَمَةِ صَحَّانِي  
أَنَا الْعَايِشُ مَا لَيْشُ أَبَدًا  
سِوَى رَبِّي وَأَوْطَانِي  
مَحَبَّةٌ فَ مَتْنٌ إِنْجِيلِي  
جِهَادِي هُوَ قُرْآنِي

تَقُولُ: بِلَدِي  
أَقُولُكَ.. مُخْلِصَةٌ وَحْيَةٍ

وصاحية للدغة الحية  
وللمجد الأكيد راحة  
ومن عند التاريخ جاية  
صحيح بتّوه خطاويها  
ويتقلّ مَشِيها شويّة  
ولكن لما نسمعها  
بتهتف: يا رجال هيّا  
يكون الرد متلاحم:  
أنا أفديكي بعيني

تقول: بلدي  
أقولك.. سُنْبلة وحبّة  
وشابّة بقلبها حابّة  
لها مليون ولد عاشق  
بشوق عارم ما يتخبّى  
براعم للسما بصّة  
على أصولها بتتربّى:  
سلام ومحبة، وإن شأعت  
عواصف م الحماس هبة  
وتشهد ع الكلام راية  
غرسها الجندي ع التّبة



تَقُول: بلدي  
أقولك.. قلب من فضة  
وناس ماتعيشني منفضة  
وواحة المولى حارسها  
بترياقه من العضة  
برغم تاريخها وشموخها  
ما زالت مُشرقة وغمضة  
وحتى ف وقت محنتها  
بتفضل ع الشموخ حضة  
تصلي ف ضيل محرابه  
ومن نبعه بتتوضي

## أنا ذلك

ولو في حدِّ عدِّالك  
طريق الصَّعب و السَّالك  
ولو آمْنِك على جِروحه  
و في نَبْيِ العيون شالك  
و لو نَسَجَ الهوى توبك  
و لو غَزَلَ الهنا شالك  
و لو ساب الحياة تنادى  
و في ساعة النِّدا جالك  
أنا ذلك...  
أنا ذلك و لو كان المدى حالك  
أنا ذلك...  
و لو تتعيني أحوالك  
ماليش قُبَّة سوى شمسك  
ولا تُربة سوى رمالك  
ماليش ماضي سوى أمسك  
ولا آتي سوى رجالك  
ماليش غيرك و لو أقدر

أشيل الجمل دا بدالك  
ماليش غيرك و لو قدري  
أكون في نجدتك هالك  
أنا ذلك..  
و ميت ذلك  
طالما انتسي في وجداننا  
و إحنا كلنا ف بالك  
طالما الرحمة في يمينك  
و سيف العدل في شمالك  
و طول ما النصر لمعاده  
و حق الأب لولاده  
و ملك الملك للمالك  
أنا ذلك..  
أنا ذلك..  
أنا ذلك..

## ادعو لمصر

كلامي الجاي مش تمجيد و لا اشادة  
ولا زفرات هوى مجروح بتتهادى  
ولا هياقات ورص قوافي كالعادة  
كلامي الجاي عني و عنكو يا سادة  
عن الحية اللي من وحدتنا منكادة  
عن الآفة اللي عاوزة خرابنا وزيادة  
عن النار اللي من غير داعي منقادة

أنا مُسلم مُوحّد باللي خلق الأرض  
واللي جعل حُرّة عقيدة كل واحد: فرض  
واللي جعل بغيتك عليها كالاعتدا عالعرض  
واللي دعا رسله جميعا للونام مع بعض  
لجل الشعوب تقدر تكافح والأمم تنهض  
وتواجه الزمن اللي أتى بارتفاع أو خفض  
وهي مالكة إرادة حُرّة للثبات و الرفض

رفض الأيادي النجسة تدنس الأوطان  
رفض اللي خانه ضميره وحالف الشيطان  
رفض اللي فاكر إنه هيعلى عالطوفان  
رفض اللي رافض ييجي وناخده بالأحضان  
مسلم سواء أو قبطي: ف دي ودي خسران  
حتى إن رجيع لضميره وحن للغفران  
لا هيقبله محراب، ولا تقبله صلبان

من يوم ما دخلك عمرو وقبلها ومن بعد  
من مبدأ الرسالات و لحد ثورة سعد  
وانتي بتبني يا مصر من السماحة المجد  
وما بين سماكي وبين شجعان ولادك عهد  
بيقو كما البنيان وقت المرار والشهد  
وان جة عليهم يوم ونزغ ما بينهم حد  
أحمد يكون البرق، جرجس يكون الرعد

ادعو يا أهلي لمصر بكل دين ولسان  
ادعو بحق محمد سيد الأكوان  
ادعو بحق يسوع و المجدلية كمان  
ادعوف صلاة الحد و بعد كل أدان  
ادعو بصميم القلب وخالص الوجدان  
ادعو وقولو يا رب. يا عدل. يا مئان  
طهر نفوس لآخوات، ترجع بلدنا أمان

## و لا ملّلي

(على وتر الجنس التام)

بيننا كلام وطني و مُش ملّلي  
راح أميل عليك، و إنت كمان ملّ لي  
قول للحياة: هاتي و لا ثملّلي  
م اللّ قطم ضهر العباد، م اللّ...  
زحزح سوانا عن طريق أمّك  
قلقانا فيه، ماقدّرش و لا ملّلي

## أحمد زكي...إلى اللقاء

يا أهلنا  
يا اللي انتو مجتمعين هنا  
يا كل عشاق الحياة و الفن  
و اللي انتو روحكو-أكيد-  
في حالة محزنة  
أحمد بيبعت للجميع سلامات  
أحمد ببسال: كيفكو يا حضرات؟  
واحد هيبجي يقوللى: أحمد مات!  
هقوللو: لأ  
موته استحالة و فرقته غير ممكنة  
و هل معقول يآثر فى الهرم  
أو مأذنة سيدنا الحسين  
حتة ورم؟!  
دا لا كان هرم  
و لا هى كانت مأذنة!  
و أحمد دا فنان محترم  
عاشق كريم بلغ بيه الكرم  
إنه يجود بالراحة و المال و الهنا

و يكون قصاد الكاميرا شعلة بتنضرم  
لجل ما تنور لنا  
و تعيش ف قلب اللي اتنسى  
و تدفي روح اللي اتحرم.

لسه النهاردة الضهر كان عنده عمل  
لسه النهاردة الضهر متحقق أمل  
وسط الجموع  
رغم الدموع  
من فوق كتاف الجرح قبل ما يندمل  
شاف البطل آخر صروحه بأكمل

بتأدي دورك و انت راقدا يا ولد؟  
والله لولا الصبر و شوية جلد  
كانت توطي تبوس أياديك البلد  
و هقول زيادة عن كده:  
اليوم في كل الأفندة  
أحمد زكي مات و اتولد  
أحمد زكي مات و اتولد



## حوار مع مولانا

(١)

في لحظة صدق معدودة  
ماشفتش زِيَّها ف عهدُه  
سألني جلاله الحاكم  
وكنيت ف ليلة ضيف عنده  
عن الشخص اللي أرضى به  
يكون في الحكم من بعده  
يُكمل عهد إنجازه  
ويُنشر في البشر مجده

(٢)

أنا قلت: اللي أرضى به  
فتى باسل ولا يهمله  
يشيل بلده على كتافه  
ويروي زرعها بدمه

رَحِمَ أُمُّهُ... خَرَجَ مِنْهُ  
نَهَابَتُهُ... فِي رَحِمِ أُمِّهِ  
دَى سِتِّ وَ دَى بَلَدٍ... يَعْنَى  
قَدَر... كَلَّتَاهُمَا تَضُمُّهُ

(٣)

ما هوش من نَبْئَةٍ عَلَيَّوِي  
و من طِينِ الْفَقِيرِ نَبْئُهُ  
و لَا يَهْمُهُ إِذَا غَضِبْتُوا  
و لَا يَبَالِي إِذَا ارْتَبْتُوا  
يَقُولُ الْكَلِمَةَ بِالْعَالِي  
و لَوْ سِيفُكَ عَلَى رَقَبَتِهِ  
يَمُوتُ وَ الْحَقُّ بِلَالِي  
و لَا إِنَّهُ يَعِيشُ كَبْتُهُ

(٤)

مِيزَانِ الرَّحْمَةِ فِي شِمَالِهِ  
و سِيفِ الْعَدْلِ فِي يَمِينِهِ  
و نَارِ الْحَزْمِ فِي عَيُونِهِ  
و نُورِ الْحِكْمَةِ فِي جَبِينِهِ  
يَزِينُ بَلَدَهُ بِأَعْمَالِهِ  
و هِيَ بِإِسْمِهَا تَزِينُهُ

يلاقى ف أهلها حصنه  
ويوهب للفدا سنينه

(٥)

سبكت مولانا و اتفكر  
وبعدين قاللي: مين هوة؟  
مفيش غيري على الساحة  
مفيش غيري أنا فتوة!  
يفضل شطارة الشرطة  
و "بعض" الحزم و القوة  
مفيش نملاية بتقاوح  
ودي الحاجة اللي مرجوة!

(٦)

صحيح بس الزمن داير  
على المخاليق يا مولانا  
لا بيسيب والى فى قصره  
و لا مسجون فى زنزانة  
قدر فوق البشر نافذ  
طالما احنا فى دنيانا  
و هل فى حد عاش أبدا  
ما أصبحش ف خبر كان؟؟

## اختلاجة في الضمير

اختلاجة..  
في الضمير  
بانفراجة  
في المصير  
للي ناوى..  
ع الكفاح  
واللي في عزمه  
السلح  
واللي رافض  
للمتأح:  
اي حاجة..  
مش كثير.

من زمان..  
و العدل هان  
بين وُصولي  
وبين جبان.  
والضحايا..

بلاد وناس  
عيشة سودة  
ومر كاس  
ياس عارم  
واحتباس  
مش بيوصل  
للسان

احنا مش غاوين  
صراع..  
أو نكون فى الراس  
صداع  
بس برضه  
الظلم ليه..  
وقع فى الأرواح  
كريبه  
و السكون  
دايماً يليه:  
رد  
مجهول الطباع  
رد فيه  
طعم الحريق  
رد وحشي..  
مش بريء  
سيل بيحرف  
كل حي

والفتايل  
وأوجاع اليمّة  
مفّيش ليها حَصْر  
وأوقات تزيد الهموم  
ع اللي شايل  
فيوصيم بلاده بذنوب أي عصر  
ولكن في لحظة سيرتها ما تيجي  
تسوي الهوايل!  
وتعمل عمايل!  
تخلي الحرارة تعود للمحبّة  
وطعم المرارة من الخلق  
زايل  
تطريّ العداوة  
وصخر القساوة  
لحدّ أما يبقى على الخد  
سايل  
تخلي المشاعر تطوف  
ع الليالي  
وتبعت لكل الخلايق  
رسايل  
إذا كنّا حثى هنو هب حياتنا  
ماتكفيش يا بلدي  
نرّد الجمائل

العابرين  
فى عيون  
الصابرين  
فى عقول  
الخابرين  
يعنى إيه  
كلمة: وعيد

## الرجاء عدم الإزعاج

كل الجهود يا ولاد  
لوطننا تتسخر  
يلا نروحله أوام  
قبل أمّا نتأخر

بس أما روحنا أوام  
بالحب و الأحلام  
كان الوطن يا همام  
نايم  
و بيشخر!



## إمتى تتحرّر

برغم فداحة البلوى...  
ببعضها  
وتتكرّر!

ورغم القسوة للقسوة  
ببعضها  
وتتبرّر!

ممرّر ليلنا ونهارنا  
وحتى الصمت..  
متمرّر

هنافضل في الأذى لمّا...  
إرادة مصر..  
تتحرّر

## يا وطن فينك

الناس بتسأل يا وطن فينك؟  
مين اللي ذلك، أو كسر عينك  
دينك تردّه إزاي، إذا كنتش  
أصلاً هتعرف إيه سبب دينك

الناس بتسأل، و السؤال جارح  
والرد واضح، و التاريخ شارح  
والأزمة بُكرة، راجعة لامبارح  
مبقاش ده سر ما بيني وما بينك

الناس بتسأل، لما بتشوفك  
غارق لحد الودن في ظروفك  
وانت اللي كان المجد في ظروفك  
والحق كان هو القوة. فرعينك

أنا نفسي ترجع يا وطن غالي  
وجبين ولادك مفتخر، عالي  
وارفع كنوس المجد، تملالي  
ولا عمري أسأل يا وطن فينك

## الغَضَب

الغَضَب  
زاد المواجه  
و الغَضَب  
غَدَى الوسائس  
الغَضَب  
كاسي الشوارع  
و الغَضَب  
ساد المجالس  
الغَضَب  
جُوءَ الجوامع  
و الغَضَب  
جُوءَ الكنائس  
الغَضَب  
يعمل زوابع  
والغَضَب  
أعنى الكوارث..  
فوق دماغك  
ياللي سامع  
بس أشك  
إن كنت حاسس

إن آخرة  
كل طامع  
يبقى عبرة  
للفرايس  
مهما كان  
له ألف تابع  
أو وراه  
ميت ألف حارس

## استشارة

راجل حكيم محترّم  
عدّى علينا وبص

لمّا رأى المشكلة  
قال اللّی جای بالنص:

ینفعلکو إنتو ما  
ولا میت خبیر مختص

ولا خمسمیت موعظة  
فوق الرفوف تترص

ولا بونبونایة أمل  
وقت الخطر تتمص

إنتو لازمکم ولد  
یيجي الحیاة بمقص

یقطع لسان الخرس  
اللّی ف حلوکم غص

وَيَقُولُ لَكُمْ يَا بَشَرَ  
أَنْ الْأَوَانِ نَقْتَصِّصَ

أَنْ الْأَوَانِ نَقْتَصِّصَ!

## لقمة الغلبان

لقمة الغلبان بتيجي  
من "جمال" بلده و "عِزّه"  
والله يوهب صوفه كله  
للكبير علشان يجزه  
بابتسامة و نفس راضية  
بتأذى غيره وتستغفره  
يقوللو "إصحى" ومهما قاله  
ومهما عادله علشان يهزه  
الضمير هأمد مكانه  
و الجِراح ما عادوش ينزوا  
دا البشر بعد أما هانوا  
بالمهانة بيستلذوا

## مين اللي غالب؟

بلدنا يا حلوة  
يا أرض المقلب  
يا رامية البلابل  
فى حضن التعالب  
وسايقه البراءة  
وعندك مخالب!  
ودايسة اللي موجب  
ورافعة اللي سالب  
ما إحنا فى عرفك..  
مُجرّد قوالب  
ولكن ميزتنا  
برغم المثالب  
بأن إحنا لحظة..  
سُكوت المطالب  
هتلقينا شوكة  
وحصوة فى حالب  
وييجى اللي عادل  
مكان اللي قالب  
وهتبان حقيقتك  
و مين اللي غالب



## مهما كنتى

أنا كنت أمشي الهوينى  
عشان الضلعة خاينه  
واسأل ع السكة : أين؟  
يجابنى السكوت

وكنت أمشي أدور  
على معنى يكون منور  
صائق، وماهوش مُزور  
يفضل بعد أما أفوت

ولقيتني بادوب ف ناسك  
وبحبك زى ناسك  
سايب دنياه، و ماسك  
فى ترابك و البيوت

واللي تاعبني تَغيبك  
هَدَف واضح، مِلْعابك  
و زَمَن دايماً مِلْعابك  
كخيوط العنكبوت

وانتي صابرة و رزينة  
رغم المَسحة الحزينة  
واحناء الله يجازينا  
بنقول: إمتى نموت؟!!

لسكن إنتى : قَدَرنا  
مهما بنبعد، مدارنا  
حبك مش باختيارنا  
وإن كنتي بطن حُوت

## عادي!

- طفحت مجاري الصّرف في شارعنا  
= عادي... ما هي حاجة حاصلة مرّة في  
الأسبوع

- أكل الجراد زادنا و مزارعنا  
= عادي... و لا الجراد يعني يموت  
م الجوع؟

- أخذ الغريب أرضك و مصانعنا  
= عادي... مين عُمره قال إن الكرم  
ممنوع؟

- ضاع كل شيء يا مفتري و ضيعنا!  
= عادي.. بُكرة أجيب غيركم حَضر  
ونجوع

- واضح أوي حُبّك لمواضيعنا  
= فعلاً... و بقول بسرعة نغيّر  
الموضوع!

## قانا

ليه يا أمة الخيبة ديّة؟  
التاريخ نسّجك بإيده..  
و إنتي فضّيتي النسيج.

و احنا أنوارك.. صباحك..  
تخسّفيننا بوجه ضاحك  
بانكسارك  
و انبطاحك  
من محيطك  
للخليج!

الأراضى..  
يعني خيرها  
و الأيادي..  
شفتي غيرها  
و الخطى..

بقى خط سيرها  
للأعادي كالحجيج

ليه يدوسوا  
فوق هاماتنا؟  
في حياتنا  
و ف مماتنا  
و إنتى مبسوطه بسكاتنا  
و سامعة صرخاتنا..  
ضحيج!

قانا داقّت..  
واحنا دُقنا  
هى ماتت..  
واحنا فُقنا  
حسّت الأشواك..  
حلوقنا  
و دابت الأرواح نشيج

لما يبقى الطفل  
فحمة  
و الجنث م الكثر..  
زحمة

يبقى مين هيقول  
يا رحمة  
و الأسى و الموت مزيج!

كلمة لسيادنا الأفاضل  
منّي..  
من أئمة مناضل  
مش هيفضل منكوا  
فاضل  
لما بحر الناس..  
يهيج

## سلو حارتنا

كان فيه واحد خد  
و ما سبش  
خبرة عظيمة  
ف فن الهبش  
يرشي و يرشوا  
و يملا ف كرشه  
لا همّا بيهدوا  
ولا بيتعبش!  
بس الكورو  
بيخلص دوره  
فبيقى مجرد..  
حتة دبش  
زيحه يا باشا  
بكل هشاشة  
و لو هيزرجن..  
إنش نبش!  
و تصحى تلاقى  
جبل مش باقى

و سَبَّحْ غُضَنَفَر  
أَصْبَحْ كَبْش  
أَدَى سِيرْتَنَا  
و سِلْو حَارْتَنَا  
يَا تَبْقَى مَغْل  
يَا مَاتِرْ كَبْش



## الفلاتر

نَكْشَنَا الْمِسْخَبِي  
وَقَلْبَنَا الدَّقَاتِر  
لَقِينَا فساد مِعَبِي  
ورِيحَة إِيه؟ يَا سَاتِر!  
لَوْ كُنَّا مِ السِّدَايَة  
بِنَسْتُخْدم فِلَاتِر  
وَكَانَ الْحَق وَاضِح  
وَكَانَ الْحَد بَاتِر  
مَا كَانْشِي يَبْقَى حَالْنَا  
بِيغْنِي عَنْ سَوَالْنَا  
عَلَى الْبُوس الّلي جَالْنَا  
وَلَا الذَّم الّلي فَاتِر

## سيف المعز...و بس

سيف المعز هوّ اللي احنا بنشوفه  
و لا حد عمره ف مرة شاف ذهبه

أسفي على جنة و خضار طارح  
طلع الصباح لاقيناهم اتنهّبوا

كانوا السنقر وهبوا الإله طاعة  
لكن وقوف ضد الحرامى..ما وهبوا

والظلم نار تحت الرماد يسرى  
بكرة هيحرقهم سوا لهبه

عذراً أمير الشعر لو أغرر:  
"فإن همّو ذهبّت (نخواتهم) ذهبوا"

## ثبات على المبدأ

كما العادة..سنين ودّت  
كما العادة..سنين جايت

كما العادة..إيدين مسكت  
كما العادة..إيدين سايت

كما العادة..سنان طلعت  
كما العادة..شعور شابيت

كما العادة..نجوم ظهرت  
كما العادة..شموس غابت

كما العادة..عقول وصلت  
كما العادة..عقول خابت

حياة كاملة بتتغير  
وغلبك يا بلد ثابت!!

## عَبَسَ

عَبَسَ يَا عَبَسَ  
يَا بُو رَاسِ جَبَسَ  
بِيعَ اللَّقْمَةَ  
وَاشْتَرَى لَبَسَ

عَبَسَ يَا عَبَسَ  
يَا بُو رَاسِ جَبَسَ  
بِيعَ الْقُلَّةَ....  
يَا وَادِ يَا حُلُولَةَ  
وَلَمَّا هَتَعَطَشَ  
إِشْرَبَ بِبَسَ

عَبَسَ يَا عَبَسَ  
يَا بُو رَاسِ جَبَسَ  
أَنَا رَاحَ أَقُولُكَ  
حَاجَةً لَذِيذَةَ  
الرَّوَقَانَ فِي الدُّنْيَا دَى  
مِيزَةَ

يعني هحصل إيه  
لو بعنا  
واحد من أهرام الجيزة؟!  
ولا إن واحد  
عاز يتوضّي  
سلفناه م النيل كام حيس\*؟؟  
عبس يا عبس!  
يا بو راس جبس!  
بيع اللقمة  
وبيع اللبس!

---

\* الحيس - فى المجرى المائى - هو أى جزء يقع بين  
عملين صناعين ( المؤلف )

## يوم معلوم

لما الحياة بتدوس  
فوقنا سنائك خيل  
ونحسّ إن الروح  
وردة في مجرى السيل  
ويبان قصاد العين  
معنى العذاب والويل  
والليل من الأحزان  
يكره يقول أنا ليل  
يصحّي الخطر في الناس  
يلسع. يشدّ الحيل  
ويقول: أيا إنسان  
شيل المواجه شيل  
واثبت: قصاد الرّيح  
و"اعدل": قصاد الميل  
رتّب ليوم معلوم  
فيه الشعوب بتقوم  
لهدف وحيد مفهوم:  
الأفعى راس،  
مش ديل

## كنزك يا مصر

ميزان النصر ثقله كفاح  
و عُمره بالخيابة ما طب

و رب الدار لها زنهـار  
وإحنا دارنا ملهـاش رب

يقول الوغد كونوا: نكون  
وندخل خلقه جُحر الضب

و من قبل الزمان بزمان  
كوانا الظلم زى ما حَب

و شفنا من الغزاة ألوان  
وكل حرامى هب و دب

ويا ما مقام تاريخنا اتهان  
شماتة وغيظ وحقـد و سب

ولكن يوم غضبنا قريب:  
ويتجاب الردى و يتلب

يا مصر إنتى خسرتى كثير  
و أمّلك: كل شابة وشاب



## خِلَصَ الْكَلَامِ

لَوْ عَ الْخِيَامِ..  
الرَّيْحَ بِتَعْصِفَ عَصْفُ  
أَوْ عَ السَّلَامِ..  
انْدَاكَ تَحْتَ الْقَصْفِ  
أَوْ لَابْتَسَامِ..  
شَارِعَ وَمَالَهُ رَصْفِ  
خِلَصَ الْكَلَامِ..  
الْمَحَنَةُ فَوْقَ الْوَصْفِ

## الشاعر في سطور

\* من مواليد القاهرة ١٩٨٣. وها يقسم  
ويعمل.

\* تخرج في كلية الهندسة بجامعة القاهرة قسم  
الهندسة المدنية - ٢٠٠٥

\* أصدر ديوانه الأول "تفاسيم" في فبراير  
٢٠٠٥

omar\_s\_helal@hotmail.com

## الفهرس

٥	اهداء
٧	مقدمة
١٣	تعارُف
١٥	أنا قلقان
١٩	حالة شجن
٢١	عن الحب
٢٣	الشعرة
٢٥	منك أنا
٢٧	البيانو
٢٩	مفيش بشر زيك
٣٠	قاصد أمان القجر
٣٤	إنني والقصيدة
٣٦	في عيد الأم
٣٧	أرزاق
٣٨	رب واحد
٣٩	بين الجبار و ربه
٤١	نسمة أمل
٤٣	وجهات نظر
٤٤	شمعة واحدة
٤٦	قولو الكلام دا
٤٧	كُتاية شاي
٤٨	حوار عن الفن
٥٢	الموت في المتاهة
٥٤	مواطن صريح
٥٥	العُربة
٥٦	خُسارتك يا جذع
٥٧	ثروات بلادنا

٥٨	لو ضميرك صدّى
٦٠	كلام..ف ساعة صفا
٦٢	أسوأ إثنين
٦٣	سفيرة الفن الهادف
٦٥	الشاعر و القرعجية
٦٧	شجون على الخريطة
٦٩	يكون المجد بالإنسان
٧١	تقول بلدي
٧٤	أنا ذلك
٧٦	ادعو لمصر
٧٨	و لا مللي
٧٩	أحمد زكي...إلى اللقاء
٨١	حوار مع مولانا
٨٤	اختلاجة فى الضمير
٨٨	الرجاء عدم الإزعاج
٨٩	إمتى تتحرّر
٩٠	يا وطن فينك
٩١	الغضب
٩٣	استشارة
٩٥	لقمة الغلبان
٩٦	مين اللي غالب؟
٩٧	مهما كنتى
٩٩	عادي!
١٠٠	قانا
١٠٣	ميلو حارتنا
١٠٥	الفلاتر
١٠٦	سيف المعز...وبس
١٠٧	ثبات على المبدأ
١٠٨	عنبس

١١٠	يوم معلوم
١١١	كنزك يا مصر
١١٣	خيلص الكلام

